

每週經課朗誦經文（巴克禮台語漢字）2015/01/25

共同經課-1 約拿書三章一節～五節、十節

1 耶和華的話第二擺臨到約拿講：2 「你起來！去尼尼微彼個大城，我所命令你傳的，你傳互伊。」3 約拿就照耶和華的話起來，去尼尼微。尼尼微是極大的城，著行三日才會通(thàng)。4 約拿入城起身行一日的路，傳講：「閣四十日，尼尼微欲倒壞！」5 尼尼微人信上帝，就宣佈禁食，對大到細攏穿麻衫。10 對按呢上帝看 in 的行做，有離開 in 的歹路，上帝就退悔伊所講欲降互 in 的災禍，亦無降落。

共同經課-2 詩篇六十二篇五節～十二節

5 我的神啊，你著靜靜，專務聽候上帝，因為我的向望是對伊來。6 獨獨伊是我的石磐，是拯救我的；伊是我的高台，我袂搖動。7 我的拯救、我的榮光在佇上帝；我的氣力的石磐、我的閃避的所在亦在佇上帝。8 恁眾百姓著時時倚靠伊，佇伊的面前傾出恁的心；上帝是咱逃閃的所在。（細拉）9 卑微的人真正是空虛；尊貴的人也是虛假；下佇天秤碗的確浮起來；in 一概比呼吸的氣卡輕。10 嘔通倚靠暴虐，嘔通因為搶提來驕傲；若財寶加添，嘔通注意佇遐。11 上帝講一擺，我有聽見二項：就是權能屬佇上帝。12 主啊，慈愛亦是屬佇你，因為你照逐人的所行來報應伊。

共同經課-3 哥林多前書七章二十九節～三十一節

29 兄弟啊，我閣講：時日促短啦。所以對今以後，有某的，著親像無某；30 啼哭的，親像無啼哭；歡喜的，親像無歡喜；買的，親像無所得著；31 用世間的物的，親像無濫糝用，因為此世間的款啲過去啦。

共同經課-4 馬可福音一章十四節～二十節

14 約翰已經關監，耶穌到加利利，傳上帝的福音，15 講：「日期滿啦，上帝的國近啦。恁著反悔來信福音！」16 耶穌經過加利利的海墘，看見西門及伊的兄弟安得烈拋網佇海裡；因為是討漁人。17 耶穌給 in 講：「恁來隨我，我欲互恁得著人親像討魚的。」18 in 連鞭離開網，來隨伊。19 略仔進前，看見西庇太的子雅各及伊的兄弟約翰佇船裡啲補網。20 伊連鞭招 in，in 就拜別 in 老父西庇太及倩工人佇船裡，來隨佇伊的後面。